

元

詩

紀

事

第十冊

PL
2534
.C4
v.10

元詩紀事卷三十一

宋遺老

侯官陳衍輯

趙復



復字仁甫德安人太宗時從姚樞北行世祖在潛邸嘗召見
不仕終

牧菴集歲乙未王師徇地漢上先公得故江漢先生見公戎
服而髯不以華人士子遇之至帳中見陳琴書愕然曰公亦
知事此耶公爲之一莞以九族殫殘不欲北公止共宿既覺
月色爛然惟寢衣留故所公遽鞍馬周號於積尸閒行及水
裔見已被髮脫履仰天而祝蓋蹈水未入也公曰徒死無義
可保君而北無他也至燕名益大著

YORK UNIVERSITY

JUN 5 - 2001

EAST ASIAN STUDIES

案元文類趙復楊紫陽文集序自稱前鄉貢進士

寄皇甫庭

寄語江南皇甫庭此行無慮隔平生眼前漫有千行淚水自東流月

自明

自遣

醉乘鸞馭到仙家彩筆雲箋賦落霞老去空山秋寂寞自鋤明月種
梅花

困學齋雜錄江漢先生趙復武昌之役始初渡江時寄皇甫
庭云云又自遣云云人甚稱之

案次首首句雜錄又作乘雲曾到玉皇家

汪元量

元量字大有號水雲錢唐人有水雲集湖山類稿

題賜硯

斧柯片石伴幽閑堪與遺民共號頑試憶當年承賜事墨痕如淚盡
成斑

改蟲齋筆疏水雲以善琴供奉國亡隨三宮入燕久之請爲
黃冠南歸藏有賜硯背刻天錫永寶四字分書右刻水雲二
篆字左刻楷書絕句云云其北征古詩云北師有嚴程挽我
投燕京挾此萬卷書明發萬里行則硯必並載入燕以詩書
授瀛國公皆此硯矣

唐珏

珏字玉潛號菊山會稽

冬青行

馬箠問饒行南面欲起語野麋尙屯束何物敢盜取餘花拾飄蕩白日哀后土六合忽怪事蛻龍挂茅宇老天鑒區區千載護風雨

冬青花不可折南風吹涼積香雪遙遙翠蓋萬年枝上有鳳巢下龍穴君不見犬之年羊之月霹靂一聲天地裂

輟耕錄歲戊寅有總江南浮屠者楊璉真伽怙恩橫肆勢燄爍人不可具狀十二月十有二日帥徒役頓蕭山發趙氏諸陵寢至斷殘支體櫻珠襦玉柙焚其齒棄骨草莽閒時珏年三十二歲聞之痛憤亟貨其家具得白金百星許執券行貨得白金又百星許乃具酒醪市羊豕邀里中少年若干輩狎坐轟飲酒且酣少年起請曰君儒者若是將何爲焉唐慘然

具以告願收遺骸共瘞之衆謝曰諾中一少年曰發工中郎
將耽耽餓虎事露奈何唐曰余固籌矣今四郊多暴骨取竄
以易誰復知之乃斲文本爲匱複黃絹爲囊各署其表曰某
陵某陵分委而散遣之藊地以藏爲文而告詰旦事訖來集
出白金羨餘以酬戒勿泄越七日總浮屠下令哀陵骨雜置
牛馬枯骼中築一塔壓之名曰鎮南杭民悲切不忍仰視了
不知陵骨之猶存也禍淫不爽流傳京師上達四聰天怒赫
赫飛風雷號令捽首禍者北焉山陰人始有籍籍傳唐氏者
由是唐之義風震動吳越聲生勢長若胥江掀八月之濤名
雖高困固自若明年己卯後上元兩日唐出觀燈歸忽坐隕
息奄奄若將絕者良久始蘇曰吾見黃衣吏持文書來告曰

王召君導之往觀闕巍峨宮宇靚麗殆非人世閒有一冕旒坐殿上數黃衣貴人逡巡降揖曰藉君掩骸其有以報唐乃陞謁造王前王謂曰汝受命寡且貧兼無妻若子今忠義動天帝命賜汝伉儷子三人田三頃拜謝降出遂覺罔不知其何也踰時越有治中袁俊齋至始下車爲子求師有以唐薦者一見置賓館一日問曰吾渡江聞有唐氏瘞宋諸陵骨子豈其宗耶左右指君曰此是己袁大駭拱手曰君此舉豫讓不能抗也曳之坐北面而納拜焉禮敬特加情款益篤叩知家徒四壁惻然嗟矜語左右曰唐先生家甚寒吾當料理使有妻有田以給左右逢迎爰諏爰度不數月二事俱愜聘婦偶故國之公女負郭食故國之公田所費一一自袁出人固

奇唐之節而又奇唐之遇兩高之曰二公眞義士爾後獲三
丈夫子鼎立頤頤凡夢中神所許稽其數無一不合咄咄怪
事乃如此唐葬骨後又于宋常朝殿掘冬青樹植于所函土
堆上有詩云云

林景熙

景熙字德陽號霽山溫州平陽人宋咸淳辛未上舍釋褐歷
禮部架閣轉從政郎宋亡庚戌卒于家

夢中作

珠亡忽震蛟龍睡軒弊寧忘犬馬情親拾寒瓊出幽草四山風雨鬼
神驚

一坏自築珠工土雙匣親傳竺國經獨有春風知此意年年杜宇哭

冬青

昭陵玉匣走天涯金粟堆寒起暮鴉水到蘭亭轉嗚咽不知真帖落誰家

珠鳧玉雁又成埃斑竹臨江首重回猶憶年時寒食節天家一騎奉香來

遂昌雜錄當發陵時林景熙故爲丐者背竹籬挾竹夾遇物夾投籬中潛鑄金牌繫腰閒賄西僧求得高孝兩陵骨貯兩函葬東嘉故夢中作詩有雙匣親傳竺國經之句

徐沁金華游錄注云楊璉眞伽發陵事諸書紀載歲月不同按元史世祖至元二十一年九月丙申以江南總攝楊璉眞伽發宋陵冢所收金銀寶器修天衣寺又按宋文憲書穆陵

遺略事及正文莊續資治通鑑皆云至元二十一年甲申僧
嗣占妙高上言欲毀宋會稽諸陵江南總統楊璉真伽與承
相桑哥表裏爲奸明年乙酉正月奏請如三僧言蓋其謀始
于甲申而成于乙酉與周草窗密癸辛雜識年月正同是時
會稽唐玉潛珏永嘉林景熙德陽鄭宗仁樸翁與臯羽咸主
王監簿家協謀收掩陵骨故別玉潛作冬青樹引以紀其事
而景熙答臯羽詩亦有夜夢繞句越落日冬青枝豈非諸公
共事之明證乎彭山季本以臯羽引中有白衣種年星在尾
之句謂與羅雲溪有開唐義士傳歲次戊寅之說相合善乎
彭瑋解之曰星在尾者寅月也此卽乙酉正月耳

宋詩紀事云六陵遺骨癸辛雜識輟耕錄俱云葬蘭亭若云

高孝兩陵林攜葬東嘉則詩中所云水到蘭亭轉鳴咽不知
眞帖落誰家又何謂耶當以周草窗陶南村所紀爲是而景
熙則共事之人也夢中詩係唐玉潛作云景熙作者非

案夢中詩明言雙匣自係指高孝兩骨當時棄骨草莽玉潛
託諸少年於倉皇急遽中只求收得遺骸豈能於諸陵之骨
全無遺漏更何能辨別分明德暘自僞爲丐者又潛用金牌
賄求故能得二陵之骨其餘亦不能盡得可知其事之難若
疑水到蘭亭句爲無謂則林所收者自瘞東嘉唐所收者自
瘞蘭亭事後必相聞知夢中作詩先及高孝二陵骨次及諸
陵骨不相妨也若夢中詩爲唐作則雙匣又何謂乎鄭先於
陶說較可信南宋書亦詳林事此詩自當屬林

讀文山集

黑風夜撼天柱折萬里飛塵九冥竭誰欲扶之兩腕絕英淚浪浪滿襟血龍庭戈鋌爛如雪孤臣生死早已決綱常萬古懸日月百年身世輕一髮苦寒尙握蘇武節垂盡猶存呆卿舌膝不可下頭可截哀鴻上訴天欲裂一編千載虹光發書生倚劍歌激烈萬壑松聲助幽咽世閒淚灑兒女別大丈夫心一寸鐵

詩藪謝臯羽歌行雖奇邃精工備極人力大概李長吉錦囊中物耳林德陽七言古不多見而合處勁逸雄邁視臯羽不啻過之如讀文山集云云可謂元初絕唱

謝翱

翱字臯羽福建長溪人徙浦城文天祥開府延平署咨議參

軍有啼髮集

招魂詞

魂來兮何極魂去兮江水黑化爲朱鳥兮其味焉食

任松鄉謝處士傳云臯羽常布衣杖策參人軍事晚登子陵西臺以竹如意擊石歌招魂之詞云云歌闋竹石俱碎失聲哭何其情之悲也

懷鄧牧心

謝豹花開桑葉齊戴勝芊生草藥肥九鎖山人歸未歸

鄧牧謝臯羽傳略臯父性耿介不以貧累人所居產薪若炭率秋暮載至杭易米卒歲少裕則資遊江海訪前代故實著宋史補詩人無傳者三十餘篇傳近世隱逸數篇歲甲午與

杭人鄧牧相遇會稽結爲方外友牧因爲言杭大都會文士輩出余知若干人盍往見之旬日別去逮牧歸杭君已挈家錢唐江上問所從遊皆前所聞者其信好學也乙未秋牧薄遊山水閒君病篤望牧不至懷以詩云云蓋絕筆也

鄭思肖

思肖字憶翁號所南福州連江人太學上舍應博學宏詞科宋亡客吳下寄食報國寺以終

遺民錄所南初名某宋亡乃改名思肖卽思趙憶翁與所南皆寓意也坐臥不北向扁其堂曰本穴世界以本之十置下文則大宋也精墨蘭自更祚後爲蘭不畫土根無所憑藉或問其故則云地爲人奪去汝猶不知耶

句

此世但除君父外不曾別受一人恩 禦寒不藉水爲命去國自同
金鑄心

輟耕錄歲時伏臘望南野而再拜乃返人莫識焉工畫墨蘭
不妄與人邑宰求之不得聞先生有田三十畝因脅以賦役
取先生怒曰頭可斫蘭不可得過齊子芳之書塾云云寒菊
云云其忠肝義膽於此可見

寧可枝頭抱香死不曾吹落北風中

寒菊

姑蘇志卓行傳

純是君子絕無小人深山之中以天爲春

畫蘭

南宋書圖繪寶鑑

一國之香一國之殤懷彼懷王於楚有光

國畫

寓意編

劉應鳳

應鳳字堯舉號書臺安福人中宋咸淳丁卯鄉試廷對授僉判宋亡隱去

句

天留仲子繼孤竹誰向西山飯伯夷

吾汶稿堯舉聞文山再執北行有句云云問其下句曰伯夷久不死必有飯之者矣

周密

密字公謹號草窗濟南人流寓吳興居弁山自號弁陽嘯翁
淳祐中爲義烏令

韓氏慶樂園

舊事淒涼尙可尋斷碑閑臥草深深
凌風閣下槎牙樹當日人疑是

水沈

齊東野語云四朝聞見錄載蜀帥獻韓平原沈香高五丈立之南園凌風閣下今慶樂園卽南園也所謂香山尙巍然立于閣前乃枯枿耳初非沈香也

爲楊大芳悼亡

帳中蜨化真成夢鏡裏鸞孤枉斷腸吹徹玉簫人不見世閒難覓返魂香

癸辛雜識大芳娶謝氏謝亡未殮有蜨大如扇其色紫褐翩翾白帳中徘徊飛集窗戶閒終日乃去

錢選

選字舜舉吳興人宋景定閒鄉貢進士有習嬾齋稿

六研齋筆記至元間吳興有八駿之號以子昂爲稱首俄子
昂以薦入朝諸公皆相附得官錢舜舉獨齟齬不合流連詩
畫以老

題浮玉山居圖

瞻彼南山岑白雲何翩翩下有幽棲人嘯歌樂徂年叢石映清泚嘉
木澹芳妍日月無終極陵谷從變遷神襟軼寥廓興寄揮五絃塵影
一以絕招隱奚足言

珊瑚網吳興公蚤歲得畫法于舜舉舜舉多寫人物花鳥故
所圖山水當世傳罕此卷蓋其自寫山居景趣既高筆墨精
妙尤爲合作詩亦雅麗非近人語僕以戊子秋七月得于書
肆如獲古圖史云因次韻識歲月于后秋風動巖樹歸鳥何

其翮我思巖中人可以樂忘年夫君乃詞客畫手故作妍吳
興圖畫藪詎隨時好遷上巖雲積雪下巖水鳴弦展卷纔尺
許坐對兩無言山澤臞者張雨題于開元靜舍之浴鵲灣

山居圖卷

山居惟愛靜白日掩柴門寡合人多忌無求道自尊鷦鷯俱有意蘭
艾不同根安得蒙莊叟相逢與細論

珊瑚網此余年少時詩近留湖濱寫山居圖追懷舊吟書於
卷末揚子雲悔少作隱居乃余素志何悔之有吳興錢選

自題桃花源圖

寡合人多忌無求道自尊鷦鷯俱有志蘭艾不同根

冊

蘅石齋詩集自注錢舜舉桃花源圖自題句云云蓋吳興八

俊趙王孫被薦入朝諸公皆相附取官爵獨舜舉齟齬不合以終其身

是日汎舟歸湖濱至夜雪大作旦起賦五言古體一首

夜來天雨雪萬木同一變飢鷗覺余起觀覽立須儼遙山瓊成積平田玉如碾老夫醒眼看樹樹何其燦

自跋至元二十九年冬余假弁山佑聖宮一室以避喧值雪作不已但閉門擁爐飲酒賦詩而已聊記數篇附見於此卷書試馮應科筆亦佳選重題

羅椅

椅字子遠號礪谷廬陵人宋寶祐四年登第

癸辛雜識少年以詩名高自標致常以詩投後村有華裾客

子袖文過之句知其爲巨富家子也壯年留意功名借徑勇
爵捐金結客馳名江湖時方尙程朱之學於是盡棄舊習而
學焉尊饒雙峯爲師

瞌睡詩

瞌睡從何來譬若風雨至曲几不得憑虛櫺那暇寄磨人眉強撐伸
手扇已墜徑游華胥國欲見混沌帝齁齁自成腔兀兀更有味息疎
疑暫醒氣窒還扶醉兒童欲惱翁搖膝問某字吻間僅一答言下已
復寐雜然拍手笑欲噉噉不遂何曾參佛祖先會點頭意何曾逢麴
車流涎已沾袂不省較短長誰能問興替陰天百怪舞開口輒差異
三百六十日何以長瞌睡

東南紀聞澗谷羅椅子遠頃由乙科登顯仕廬陵大儒也江

南革命後歸隱故鄉嘗作瞌睡詩曲盡其妙末意尤有味云

劉辰翁

辰翁字會孟號須溪廬陵人宋景定廷試對策忤賈似道置丙第以親老請濂溪書院山長大德初卒

勤有堂隨錄劉辰翁其人好怪父喪七年不除

月詩

霓裳聲裏一擲如今是第幾輪赤壁黃樓都在古今多少愁人
癸辛雜識劉會孟嘗作月詩六言云云爲人所訐幾殆

蘇李泣別圖

事已矣泣何爲蘇武節李陵詩噫

輟耕錄痛快嚴峻抑揚感傷

熊禾

一作
鉢

禾字位辛號勿軒又曰退齋建陽人宋度宗咸淳十年登第
授甯武州司戶參軍入元隱居不仕

贈筆生

東坡詠鼠鬚山谷歌猩猩微物豈足道斯文頗關情片言鈇鉞凜一
字華袞榮化工運方寸亦自芒中生寄與管城子所託甚非輕

熊勿軒集原評有鈇鉞華袞之任自不得不託管城子發揮
予奪

贈琢硯

我聞銅雀瓦只覆嬌屋姝又聞端溪石亦近貪泉夫胡爲得貴重置

我几案隅尙恐習氣膩解使簡冊汚我有一寸鐵秉心與之俱永矢磨不磷千載明區區彼哉瓦與石飄擲付太虛

熊勿軒集原評先生自矢不磷不與瓦石同碎居然節義

梁棟

棟字隆吉其先湘州人後遷居鎮江登咸淳四年進士官錢塘仁和尉宋亡弟柱入茅山從老氏學棟往依焉乙巳無疾卒有梁隆吉詩鈔

四禽言

脫卻布袴貧家能有幾尺布寒機剪盡無可裁可人不來廉叔度脫卻布袴

不如歸去錦官宮殿迷烟樹天津橋上兩三聲叫破中原無住處不

如歸去

提葫蘆今年酒賤頻頻沽衆人皆醉我亦醉哀哉誰問醒三閭提葫蘆

行不得也哥哥湖南湖北秋水多九疑山前叫虞舜奈此乾坤無路何行不得也哥哥

山房隨筆云寓意甚遠諸作不及

登大茅峯

杖藜絕頂窮追尋青山世路爭嶇嶇碧雲遮斷天外眼春風吹老人
開心大君上天寶劍化小龍入海明珠沈無人更守元帝鼎有客欲
問秦皇金嶺崖誰念受辛苦古洞未易潛幽深神光不破幽暗惱山
鬼空作離騷吟我來俯仰一慷慨山川良昔人民今安得長松撐日

月華陽世界收層陰長嘯一聲下山去草木爲我留清音

至正金陵新志

至正直記遺編宋末士人梁隆吉有詩名以其弟中砥柱爲黃冠師三茅山嘗往還一日登大茅峯題壁賦長句有黃冠訴于句容縣以爲訕謗朝廷行省聞之都省收梁于獄禮部免其罪放還

高晞遠

晞遠字照庵通州人咸淳德祐間嘗通判平江府入元未仕

句

豪氣欲吞天下士冷官初到岳陽城

輟耕錄樵李顧淵白恃才傲物嘗入京獻燕都賦翰長元公復初不喜曰今天朝四海一統燕蓋昔時戰國稱何燕之稱

慚恨而歸晚年始得領教岳陽高照菴先生以詩送之云云
切中其實

牟巖

巖字獻之其先蜀人徙湖州登宋進士第官大理少卿入元
不仕有陵陽集

題水村圖

山色濃還淡孤村水遶之俗塵飛不到野老住偏宜
碕岸疎疎柳茅簷短短籬小舟欹側過便是少陵詩

詳錢仲
鼎下

句

翻手可覆手曲身成直身

癸辛雜識牟巖之嘗有謝人送炭一聯云云

李珣

珣字元暉吉水人宋末爲攢宮屬官大德間年八十餘自號
廬陵民人稱鶴田先生

題汪水雲湖山類稿

天地事如許英雄髻已斑淚添東海水愁壓北邙山

湖山類稿附錄案元詩癸集同詩藪引後二句作淚傾東海
盡愁壓北邙低與首二句不同韻自非

題郭主簿模摩詰本輞川圖卷

園圖親畫早流傳已是人間五百年凝碧池頭秋句在當時幾負此
林泉

珊瑚網王右丞輞川圖與余昔在杭茗故家見者一樣前有

集賢院御書印內合同印題摩詰本後書河北郭忠恕奉命
復本則知爲江南李後主時臨本也虎賁中郎更無辨處郭
亦妙筆矣右丞唐開元天寶朝士名維字摩詰工詩畫輞川
其所居自寫爲圖精密細潤在小李將軍著色山水右今如
魯寶玉大弓絕無僅有吾昂霄珍之重之攜上天京名公相
一見賞識鑒定增十倍價大德戊戌冬至廬陵民八十叟李
珣元暉跋

句

此水自當兵十萬昔人曾有客三千

梅磻詩話江陰乃春申君舊封君山浮遠堂瞰江對淮爲一
郡佳境李鶴田一聯云云人多稱誦

魏新之

新之字德夫桐廬人宋咸淳七年登進士第除教授

春日田園雜興

農圃誰言與世違
韶華正恐屬柴扉
天機花外聞幽哢
野色牛邊睨落暉
膏雨平分秧水白
光風小聚藥苗肥
行歌隱隱前村暖
忽省深山有蕨薇

又
月泉吟社第六名起有頓挫二聯善琢句善鍊字末意尤永

野景入時務
東風鬪滿鋤
笛聲牛出後
酒味燕來初
穀種天心在
桑枝帝澤餘
紅塵幾飛鞚
肯信有農書

月泉吟社第五十三名起句快便結意深遠兩聯亦高不得

已屈置諸此

何鳴鳳

鳴鳳字逢原分水人宋末官教授

前題

東風轉囑又東臯久賦將蕪力未薊古木陰深巢燕弱荒陂水淺怒
蛙號兒癡方擬半栽秫身隱尙嫌全種桃何許蕨薇君欲采饑眠堪
羨華山高

月泉吟社第十四名語健意深雖首句疊字微欠推敲後聯
與末聯過人矣

又

星明天駟兆興農稼圃犂鉏處處同播穀競趨新禹甸條桑猶記舊

幽風草綠疆畎縱橫綠花隔藩籬深淺紅自笑偷生勞種植西山輸與采薇翁

月泉吟社第四十五名雋味寓於細律中微作者不及此

高鎔

鎔字聲玉三山人宋末官婺州教授

前題

已學淵明早賦歸東風吹醒夢中非鶯聲呢昵來談舊牛背安閒勝策肥時聽樵歌時牧笛間披道氈間農衣篇詩那可形容盡何似忘言對夕暉

月泉吟社第二十二名五六作意就雜字上形容略似爲氣格之累第二句穎拔末用淵明意尤佳

陳傑

隱居通議近世豐城陳壽父傑號自堂江西名詩人

案宋詩紀事作陳杰字壽夫分甯人宋咸淳十年進士制置
司屬官有自堂集而七修類稿以爲元人必入元尙存

春風

著柳成新綠吹桃作故紅衰顏與華髮不敢怨東風

七修類稿唐崔道融題班婕妤好曰寵極辭同輦恩深棄後宮
自題秋扇後不敢怨東風曹鄴題庭草曰庭草根自淺造化
無遺功低徊一寸心不敢怨春風元陳自堂題春風云云句
意相似

林月香

句

楚人一縷垂亡命盡向秦庭哭得回
六國既亡秦一統如何却道
帝秦非
那知老子癡頑福曾見官家歷五朝
可憐幾幅通神畫
只入桓元夾袋中

吳文正公集昔予弱冠與程鉅夫同學臨汝書院時月香林
君以鄉先達日坐前廡位予二人朝夕出入以諸生禮詣位
趨揖然後退不十年事大異鉅夫爲達官位於朝予爲農夫
耕于野林君亦歸隱于市又數年君暫出爲縣大夫客始相
見予既壯君亦老矣一日君以詠史一編示予君謂觀者必
笑其癡余讀至申包胥云云魯仲連云云馮道云云顧愷之
云云曰誰謂君癡誰謂君癡

莫崙

崙字子山號兩山江都人咸淳四年進士入元不仕

書壁

又得浮生半日閒忽聞春盡強登山因過竹院逢僧話終日昏昏醉夢閒

湛淵靜語莫子山暇日山行過一寺頗有泉石之勝因誦唐人絕句以快喜之云終日昏昏醉夢閒云云及叩其主僧庸僧也與語略不相入屢欲舍去僧意以爲檀施苟留作午供鬱鬱久之因索筆以前語錯綜其詞書于壁云云

錢仲鼎

仲鼎字德鈞通州人徙居吳宋末以詩經發解入元不仕

水邨歌

舟搖搖兮風嫋嫋兮波鱗鱗兮鷗翩翩兮扣舷漁歌兮孰知其他兮
珊瑚木難水村圖大德六年十一月望日爲錢德鈞作子昂
後一月德鈞持此圖見示則已裝成軸矣一時信手塗抹乃
過辱珍重如此極令人慙愧子昂題鄧椿詩云云又六言一
首云云梅塘吳延壽云云顏天祥云云男資深原父云云林
宏云云干文傳云云松陵葉齊賢云云吳郡陸桂云云哲理
野臺云云陸祖宣錄秦風蒹葭三章跋云閱水村圖其景物
蕭瑟煙波浩蕩有人乘扁舟往來其閒此圖此意殆與此詩
若相符者故書於其後云延祐己未九月從大詩云云聚山
黃肖翁云云東南仲云云羅志仁云云陵陽牟巘云云漢東

孟淳云云

孫嵩

嵩字元京休寧人宋末入太學有艮山集

冬夜雜興五首

今晨霜露肅愛此羣山秋芳菲者何樹乃是丹楓稠草花無名字正
類黃菊幽一筇步澗阿聊復舒我眸雁聲一何高渺渺關山愁林閒
有橡栗歲晚行可收

鐘聲煙外寺報我明朝霜籬落暝雀驚原野昏鴉翔杖策歸茅茨偶
一歌慨慷千載有我輩感念行斜陽

齋中乃無紙柿葉平籬根稍取書點畫帶此朝露痕識字有何補隨
爾憂患繁姓名縱不記適有古意存惜哉結繩後事始於乾坤先生

晚始悟無術鳩田園

秋晚種粦麥覆塊青茸茸茲物乃畏濕溝作棋道通江南地方瘠百穀勞農工稭稌蓄塋土粦麥藏溝中從之防蹂嚙早晚觀麥叢須縱牛羊食勿信東坡翁吾詩乃農譜亦著江南風

新安文獻志方虛谷曰元京詩有近陶者有似二謝者有似元次山孟東野者清勁枯淡整嚴幽遠五言古體如秋懷感興及冬初雜興諸作近世詩人所不能爲不謂吾州近有此人持是以見朱文公可無愧哉

孫巖

巖字次臯休寧人嵩之弟有爽山集

方回序云長孫君嵩詩清勁苦淡如其爲人小孫君巖予未

之識忽袖詩訪於武林亦清勁苦淡如其兄

兵後續溪道中

古道緣流水寒郊帶斷烟
稀疎鴉種麥羞澀女耕田
人事休兵後秋懷落木前
小蘇遺翰墨今古一山川

新安文獻志方虛谷云休兵落木之句非近人晚進所能到

九日呈戴兄

一別三十載而今近講堂蕭條同甲子
強健又重陽
萸菊數杯酒烟雲千仞岡
偶然爲此夢寧復次公狂

新安文獻志方虛谷云類陳后山

溪上

溪翁生計獨熙然
新買南鄰舴艋船
日載鸕鷀三十尾
魚爲租入水

爲田

新安文獻志方虛谷云此絕類陳后山不具隻眼者不識也

吳龍翰

龍翰字式賢歙人宋咸淳鄉貢至元丙子鄉校請充教授尋棄去有古梅吟稿

樂府

妾心江岸石千古無變更郎心江上水倏忽風波生
製衣寄夫壻妾有冰雪段中閒連理枝不忍翦教斷

方虛谷云式賢詩有驚人語如樂府諸篇尤予所深喜者

草堂

蒼煙落日草堂深淺淺寒侵白玉簪等客不來童睡去自搖脩竹和

新吟

新安文獻志方虛谷云式賢嗜奇學博如此絕尤予所深喜者

曹良史

良史字之才號梅南錢塘人咸淳故老與周草窗游有詩詞三摘

俞宗大序云曹君故宮詞十九首與夫拜景靈游湖曲登北城悼今思古所謂哀而不傷怨而不怒忠厚而悱惻者也

句

雲生畫佛壁葉落病僧房
閑來閉門處認得讀書聲
牆圉敗屋知無主
風響荒林似有人
深樹月昏神火出
斷烟雪霽獵人回

方虛谷跋曹君良史錢唐人衣冠佳盛湖傲山酣則有咸淳
詩摘兵火變遷江淮奔走則有梅南詩摘句如云云展轉征
旗戰鼓十年閒筆力益老矣

陳普

普字尙德號懼齋寧德人居石堂山下有石堂先生遺集
元詩選普生鷓鴣百數繞屋七歲時坐田閒有白鷺飛止有
士人戲語之曰汝能賦一詩乎應聲曰我在這邊坐爾在那
里歇青天無片雲飛下數點雪士人奇之

顏杲卿

驪山歌笑入青雲曾識常山有戰塵忠骨已漸餘髮在因人得見夢
中身

興廢從來固有之爾家忒煞欠扶持諸墳掘見黃泉骨兩觀番成白
地皮宅眷皆爲撐目兔舍人總作縮頭龜強奴猾幹欺凌主說與人
家子弟知

輟耕錄秀之斜塘有故宋大姓居焉家富饒而子孫多不肖
祖父財產廢敗罄盡郡人金方所談辭滑稽爲撫其事成近
體一律云云夫兔撐目望月而孕則婦女之不夫而妊也其
家有道觀二所語雖鄙俚然爲人後者見此甯不知懼哉

項平父

絕句

日長沙岸立看雲只念家如何永州夢偏愛在長沙

研北雜志項平父詩云云與賈島却望并州之句全類也

于演

演字佩遠台州臨海人

題金鰲山

金鰲之山金碧浮重元寶坊居上頭鐘聲夜度海門月樹色遠攬豐
山秋龍伯國人真妙手掣此巨靈鎮江口丹邱逸士來跨之石窪爲
尊江當酒黃鬚天子七寶鞭黃頭漁郎擢江船百年塵跡果何在芒
碣雲去山蒼然歷試諸難固天造中興開國何草草腹心有疾日月
昏英雄無聲天地老兩宮不歸汴水流此地空傳帝子游惜無健筆
驅風雨一洗江山萬古愁

輟耕錄吾鄉于佩遠先生題金鰲山詩云云至今膾炙人口
山枕海屬臨海縣章安鎮初宋高宗在潛邸日泰州人徐神

翁云能知前來事羣閣言於徽宗召至以賓禮接之一日獻詩於帝曰牡蠣灘前一艇橫夕陽西去待潮生與君不負登臨約同上金鰲背上行及兩宮北狩匹馬南渡建炎庚戌正月三日帝航海次章安鎮灘淺閣舟落帆於鎮之福濟寺前以候潮顧問左右曰此何山曰金鰲山又問此何所曰牡蠣灘因默思神翁之詩乃屏去警蹕易衣徒步登岸見此詩在寺壁間題墨若新方信其爲異人也

李宗洌

閔項氏

少無依倚老何堪白髮婆婆亂不簪夢裏尙思江北好悔將夫骨葬

江南

輟耕錄燕山項氏其夫江南人行賈燕薊間聘項與居未幾夫死項奉柩回江南勵志子居以守夫祀盱江李宗洌閔其事賦之云云

徐孟岳

岳王墓

童大王回事已非岳將軍死勢尤危直教萬歲山頭雀去繞黃龍塞上旗飲馬徒聞腥鞏洛洗兵無復望條支湖邊一把摧殘骨蓋世功成百世悲

歸田詩話岳王墓詩趙子昂云云世皆稱誦和者二人亦傑作也徐孟岳云云高則誠云云

吳仁叔

答內

一幅空箋聊達意佳人端的巧形言賢妻若也投科試應作人間女

狀元

詳韓氏下

吳伯慶

挽張伯成

何處重逢說別時斯文千載盡交期學憐知己先登早生愧同庚後
死遲箋疏空令傳杜律誌銘誰與繼唐碑寡妻弱子將焉託節傳遺
文只益悲

筆精杜律虞註楊文貞作序疑其不出伯生之手然實京口
張伯成所著也亦元進士後世借伯生之名以行元吳伯慶
有挽張伯成詩云云

楊鵬翼

鞦韆

日轉華簷樹影偏謝家庭院簇神仙
綵繩斜擘纖纖筍畫板輕承步
步蓮弄玉未升雲漢上綠珠先墜舞樓前
不知小徑殘紅裏明日何人拾翠鈿

筆精咏鞦韆詩以洪覺範之作爲最而元人楊鵬翼一首尤佳也云云

張明

句

春風跨馬銀鞍穩夜月騎牛鐵笛閒

江南通志玉山在府南十里其上多古木蒼藤有惠昭寺宋

尙書梅詢讀書處李含章亦嘗隱此元張明詩云云蓋詠二
事也

案府甯國府

侯友彰字夢符衡山人

句

萬錢終有命遺汝不如廉

萬歷湖廣總志以進士任臨桂縣尉廉慎不苟其示子詩有
云云之句人敬重之

何有成

句

曾有仙人雙白鶴可無老子一青牛

山堂肆考白鶴觀在岳州石門縣北宋時建元何有成詩云

劉淵

花林院

花落春已暮開門白雲來階前一片石風雨留莓苔

山堂肆考花林院在南雄府城東元劉淵詩云云

郭正平

句

灞橋柳絮人千里楚澤蘆花水半扉
身臥不知雲子白氣酣聊作
木奴酸

龍性堂詩話元人郭正平詠雪云云皆楚楚有致

文若

題第一山

汴水東流繞舊京
恢圖妙算入皇明
暫携諸將停歸騎
來看中原第一城

中都志此元人詩
已有入皇明之句
帝王之興豈偶然哉

李明中

題秋山小景

家在夕陽三峽口
人行秋雨兩巖閒
不知何處堪圖畫
移得柴門到楚山

閒居偶錄史冊中所載隱士鮮有不工詩者其詩別有一種瀟灑出塵之致如元李明中工山水題秋山小景云云

張孟

句

鴻濛再剖一天地書契復見科斗文

升庵書品元朝主中國日用羊皮寫詔謂之羊皮聖旨其字
用蒙古書中國人亦習之張孟詩云云張光弼輦下曲云和
甯沙中撲朔筆史臣以代鉛槧事百司譯寫高昌書龍蛇復
見古文字蓋春秋多微詞之義也

張起

句

別來越樹長爲客看盡吳山不是家

輟耕錄張起四明人有詩名嘗作一聯云云未幾卒詩亦有

讖歟

韃韃啞

戲贈瞽者

就鞍和袖綰絲韁也逐王孫出晉陽人笑但聞誇景物風來應解審
笙簧馬蹄響處無芳草鶯舌調時有綠楊休道不知春色好東風桃
李一般香

草木子韃韃啞御史春日與一瞽者並馬出遊晉陽因戲贈
以詩云云不待吟諷亦知其爲瞽者之詩也

元詩紀事卷三十三

道流

侯官陳衍緝

邱處機

處機字通密號長春子登州棲霞人學道於重陽真人有礪

溪集

元史歲己卯太祖自奈曼命近臣札八兒劉仲祿持詔求之
處機一日忽語其徒使促裝曰天使來召我我當往翌日二
人者至處機乃與弟子十有八人同往見焉自崑崙歷四載
而始達雪山常馬行深雪中馬上舉策試之未及積雪之半

雪山

當時悉達悟空晴發軔初來燕子城

撫州是也

北至大河三月數

卽陸河也四局

二月盡到約
二千餘里

西臨積雪半年程

即此地也山常有雪東至陸局河五千里七月盡到

不能隱地迴風坐

有道法迴

風隱地勢斗藏天之術

卻使彌天逐日行行到水窮山盡處斜陽依舊向西傾

長春真人西遊記踰嶺而南至蒙古營宿拂廬旦行迤邐南

山望之有雪因以詩紀其行云云郵人告曰此雪山北是田

鎮海八刺喝孫也八刺喝孫漢語爲城中有倉廩故又呼曰

倉頭

邊埃紀行北過撫州惟荒城在焉北入昌州有廨舍亦有倉

廩

至回紇城暇日出詩一篇

二月經行十月終西臨回紇大城墉塔高不見十三級

以磚刻鏤玲瓏外無層級內可通行

山厚已過千萬重秋日在郊猶放象夏雲無雨不從龍嘉蔬麥飯葡

萄酒飽食安眠養素慵

長春真人西遊記過大河至邪米思干大城之北太師移刺
國公及蒙古回紇首載酒郊迎大設帷幄因駐車焉宣師劉
公以路梗留師從之太師遂月奉米麪鹽油菓菜等物公見
師飲少請以蒲萄百斤作新釀師曰何必酒邪但如其數得
之待賓客足矣其蒲萄經冬不壞又見孔雀大象皆東南數
千里印度國物師因暇日出詩一首云云

遊郭西歸作

陰山西下五千里大石東過二十程雨霽雪山遙慘淡春分河府近
清明邪米思干大城大石有國時名爲河府園林寂寂鳥無語花木雖茂並無飛禽風日遲遲花有情同

志暫來閒睥睨高吟歸去待昇平

長春真人西遊記二月二日春分杏花已落司天臺判李公
輩請師遊郭西宣使泊諸官載葡萄酒以從是日天氣晴霽
花木鮮明隨處臺池樓閣間以蔬圃憩則藉草人皆樂之談
元論道時復引觴日昃方歸作詩云云郭西園林相接百餘
里雖中原莫能過但寂無鳥聲耳

寄東方道衆

當時發軔海邊城海上干戈尙未平道德欲興千里外風沙不憚九

夷行初從西北登高嶺卽野狐嶺漸轉東南指上京陸局河東畔東南望上京也迤邐直

西南下去又西南四千里到兀里朶陰山陰山之外不知名陰山西南一重大山一重小城水數千里到邪米思干大城

師館於
故宮

長春真人西遊記宣差李公東邁以詩寄東方道衆云云

邊埃紀行至宣德州復西北行過沙嶺子口及宣平縣驛出
得勝口抵扼胡嶺

西遊記金山以東釋扼胡嶺疑卽野狐嶺之異名矣

奉詔回作

外國深蕃事莫窮陰陽氣候特無從纔經四月陰魔盡

春冬霖雨四月純陽絕無雨

却

早彌天旱魃凶浸潤百川當九夏摧殘萬草若三冬我行往復三千里不見行人帶雨容

長春真人西游記始師來觀三月竟草木繁盛羊馬皆肥及
奉詔而回四月終矣百草悉枯作詩云云

王元粹

元粹字子正初名元亮後止名粹平州人

句

十月風霜侵病骨數家鍼線補殘衣

中州集年十八九作詩便有高趣正大末用門資敍爲南陽
酒官遭亂流寓襄陽襄陽破隻身北歸寄食燕中遂爲黃冠
師有云云之句親舊有憐其孤苦欲爲之更娶者子正業已
高舉主太極道院竟不能自返年四十餘癸卯九月病卒

聶碧窗

哀被虜婦

當年結髮在深閨豈料人生有別離到底不知因色誤馬前猶是買
燕脂

誠齋雜記聶碧窗有哀被虜婦詩爲一時稱誦

北朝赦至感而有詩

乾坤殺氣正沈沈又聽燕臺降德音萬口盡傳新詔好四朝誰念舊
恩深分茅列土將軍志問舍求田父老心麗正押班猶昨日小臣無
語淚沾襟

詠北婦

雙柳垂眉別樣梳醉來馬上倩人扶江南有眼何曾見爭捲珠簾看
固姑

題趙太祖真容

鳳表龍姿儼若新一回展卷一傷神天顏亦怪君非虜河北山東總
舊臣

山房隨筆京口天慶觀主聶碧窗江西人嘗爲龍翔宮書記

北朝敕至感而有詩云云又詠北婦云云觀中有趙太祖眞容北來者見必拜聶因題其上云云

梁大柱

大柱字中砥其先湘州人徙居鎮江入句曲山爲道士

送存書記

一作與存此山上人山行
吳興趙公作詩意圖

一聲兩聲松子落三片五片楓葉飛夕陽在山新月上道人相伴一僧歸

清河書畫舫吾家舊藏陳深手書甯極齋稿計四十葉筆意不減子昂今歸荻溪王氏內有題梁中砥詩趙子昂畫古體一篇附此其序曰中砥有送存書記詩云云趙公子昂畫而爲圖中砥索詩漫賦一首

案宋詩紀事作梁棟詩誤

張侍講伯淳跋畫卷後云觀子昂所畫梁中砥茅山送客詩
景如行靈鷲道中商榷月中桂子一段清事又如楓葉吳江
得句時此意超然塵外固將物我兩忘道邪釋邪吾不得而
知也

馬臻

臻字志道別號虛中少著道士服隱於西湖之濱有霞外集
句

達人不患貧貞女不事媚 靜知春事佳老覺世味熟 古交山上
松今交陌上花 某丘有樹猶堪宿何處無魚可療飢 瘦梅喜浸
古壘盜老態怕著新衣裳

霞外詩集黃石翁序後來作詩專門大家何限及見林逋魏野孤聯隻字便自使人意消余欲摘虛中詩顧未暇童子在旁問所摘余爲舉云云後世視此數聯以爲何如人也

吳全節

全節字成季號閒閒饒州安仁人學道於龍虎山張留孫世祖賜號上卿至治間授玄教大宗師有看雲集

道園學古錄作南山諸詩沈鬱哀慕

句

要知顏子如愚處正是羲皇未畫前

道園學古錄嘗作環樞之室畫先天諸圖於壁有詩云云其所造蓋如此

句

渭城朝雨歌三疊湘水秋風賦九疑
錦水東流江月白潼關西擁

蜀山青

詩藪吳成季云云

李道坦

道坦字坦之錢唐人

杜鵑行

吾聞昔有蜀天子化作冤禽名杜宇
一身流落懷故鄉萬里逢人訴
離苦西來縱呼巫峽間楚臺花落青春闌
臺中魂夢久寂寞行雲日
暮愁空山明朝復向瀟湘發
北叫蒼梧江竹裂竹間之淚花上血
怨入東風俱不滅天涯無窮朝暮啼
王孫草綠不須歸哀哉王孫終不

歸江南江北楊花飛

吳禮部詩話坦之早歲入道洞霄宮學文於隱者鄧牧作杜鵑行云云時年二十餘爾逮從鄧公日益精進其歌行最爲流麗

寄吳正傳

拂袖行歌歸故鄉相思又是一星霜夢回江上秋風杳愁入天涯春草長書問久淹嗟契闊詩章時讀慰淒涼知君亦有逍遙興肯學征鴻爲稻梁

送人歸嚴陵併寄吳正傳

官車一兩馬並馳送君朝出城門西投觴誓河以爲別東流到海無還期雲間掛冠歸故里河上停帆謝遊子不願松江食巨鱸甘向桐

江釣寒水子陵昔釣川之側百尺高臺猶屹立斜日歸舟繫石根稽
首清風無愧色金華洞天清且幽神仙牧羊松下遊故人吳君仙者
儔高臥巖屋秋浮浮茲山相鄰爾睦州山翠俯壓城南樓吳君之家
某水邱尺書欲煩親手投一見足寫平生憂

高將軍白鷁子歌

淮西猛士高將軍新獲驍禽被涼素調之弗顧情未狎跨馬臂出城
東去征鴻作字雲邊斜聳身直上誰能遮天寒日暮望不見北風萬
里吹瑤花雲飛忽斷鴻飛却短草長煙沙際漠但餘孤色搖清秋未
許纖毫生碧落歸來珍衛不解鞫親手餒肉供飢喉英雄遇合固有
分可惜驚塵俱雪頭

李白酒樓歌

溧陽酒樓春水涯白馬繫在樓東家千金醉盡不復顧猶吹玉笛引
吳娃日斜樓外東風起春愁滿眼楊花裏高歌一曲下樓去傳徧江
南數千里錦袍綠水迷蹤跡月落空梁照顏色江頭盡日不見人樓
上幾年無此客倚欄仰看西飛雲胡爲不飲愁其身卽今寂寞千年
後誰酌青山山下墳

句

落日中原小悲風易水寒 凡物皆歸土深山始見天
葉落城南草綠
王孫去江上花飛燕子來 清江百轉秋花底漁火孤舟暮雨中
芙蓉水碧雙鳧冷苜蓿秋高萬馬肥

吳禮部詩話在蘭江時嘗手寫一帙留予家至大戊申別後
寄友三詩一以與予云云又送人歸嚴陵併寄予云云坦之

素善書余愛之嘗裒其手寫者一卷爲人竊去僅存一幅二詩皆佳高將軍白鶴子歌云云其一李白酒樓歌云云警句如落日云云嘗自言以此詩寄鄧善之鄧借以爲己作凡物云云不可勝錄也

句

天寒日暮望不見北風萬里吹瑤花

詩藪白鶴子歌天寒云云語甚雄峭又落日云云芙蓉云云大類近日嘉隆語

案落日芙蓉云云前已標出

薛玄曦

玄曦字玄卿河東人入道龍虎山至正三年制授弘文裕德

崇仁真人有上清集

送朱本初之玉隆堂

西山紫翠簇芙蓉師住逍遙第一峰
慎勿挽弓思射鹿祇須鑄鐵學降龍
閒穿曉月鉏靈藥醉拂秋風臥古松
應憶京華舊遊處蓬萊坊畔五雲重

皇元風雅題作送真一詩云西山紫翠鬱芙蓉
師住逍遙第一峯
滕閣雨收瞻駐鶴
楚江沙長羨降龍
有時帶月鉏靈藥
無事焚香對古松
謾憶京華舊遊處
蓬萊坊畔五雲東
與此小異

句

臂鷹過雁磧老馬上龍堆
明月夢回夔子北長風吹度夜郎西

詩藪元五七言律可摘者薛玄卿云云

黃石翁

石翁字可玉南康人有松瀑集

清客居士集家居廬山下少多疾父母強使爲道士

寒食客中

明朝便典黑貂裘寒食甯無數日留煙斷昔曾悲介子火衰今不祀
商邱百年盡付風吹柳一雨遠隨山入樓安得五侯鯖到我自脩茶
事試香篝

慘淡微茫斷客魂最難忘處最難言南陵不可避風雨麥飯如何託
子孫往事滄江吹白鳥誰家鐵撥送金尊欲尋隱者相傾倒煙柳深
深不見門

吳禮部詩話黃石翁寒食客中云云詞旨精深音節悲壯淒涼感慨之意溢於言表讀之猶使人惻然

句

看山如覓孟萬年君自求之眉睫閒病翁生愁午睡去舟行失却九峯山前瞻數點頗銛銳沿流計程只此是

吳禮部詩話舊得黃可玉江行小稿讀其望九華山詩云云愛其意新而語佳後閱程致道北山集望九華山詩序云船發大雲倉五十里許顧江南衆山中有數峯奇爽特異一見卽知其爲九華問篙人果然因知褚季野於廣坐中識孟萬年正應如此黃豈嘗見此耶不然則詩人胸次之妙固有不約而同者

句

歷落求奇蹟丁甯問異書 石刻披秦篆銅章驗漢官

研北雜志廬山道士黃石翁可玉父好學多聞性狷介士大夫多與之游嘗有詩云云又云云蓋其好古之篤如此

王與敬

與敬號秋崖三山人武夷山道士

句

依然拂袖歸山去止止庵前伴白雲

武夷山志嘗遊雲州求兩大應城中有妖治之頓滅當事薦於朝授號至道元應通妙法師至大間乞還山有句云云

彭日隆

日隆號隱空崇安人武夷山道士

自讚

五五二十五只管從頭數到底一也無松梢月當午

武夷山志信口吟詠頗有理致嘗自讚云云卒時正七十五歲

朱思本

思本字本初臨川人出家上清宮三華院有貞一齋雜著

案貞一齋雜著遊廬山記有奉詔芑衛玄教乘傳播告江南云云

盜發亞父冢

戲馬臺前范增冢英風千載行人竦冢中寶氣騰光芒識寶賈胡心

爲動築室潛謀二十年一朝鑿井穿其壘舂鍤纔深四十尺乃有石
盤青巖崿四旁牂牁大十圍各施九十森環拱石穿棺翼更分明漆
光可鑑剛而鞏斲之不用揮金椎白骨儼然全頂踵寶劍未化橫蒼
虬金玉輝耀氣交擁賈胡致富須臾間棄骨溝中甯愧恐平原無色
鼓角悲山鬼夜號川澤湧太守陳公英俊才慨歎奸偷吾所統亟呼
五百取羣盜械置狴犴見仁勇傷哉亞父天下奇鴻門高會眞危機
火龍飛起實天意拔劍起舞空爾爲風雲變化失隆準玉斗一碎山
河非如公明義古亦少發憤乃作彭城歸六合茫茫漢疆土厚葬何
人誠可嗤君不見驪山牧豎遺燼酷不如王孫裸葬良亦足

風月堂雜識范增墓一名亞父塚在徐州城南一里許元季
有賈胡盜發其塚深四十尺許得寶劍虞邵菴諸公皆有詩

悼之朱本初一首云云

伯生學士見和僕與李學士詩紙尾批云已與漑之約紅梨花
開當往訪也臥病不知春事淺深清明後四日聞梨花盛開
復用清明詩韻呈玄德真人伯生漑之二學士

紅入梨花媚更明黃鶯飛下眼頻傾玉容帶酒含春色絳袂迎風感
物情幻化可能窮妙理追歡聊復得浮生開尊爲報虞夫子莫待續
紛雪滿城

清明後四日紅梨花開用明字韻賦詩一章奉邀虞李二學士
以踐看花之約玄德真人且屬和矣學士竟不至又六日風
雨大作花已委地依韻再賦一章呈玄德真人並簡二學士
霞卷雲舒映樹明花如嫵媚向人傾仙翁染翰饒詩興學士停驂傲

物情有限光陰春事老無端風雨莫愁生明朝掃地紅英遍却待尋芳出鳳城

案右二詩見貞一齋雜著元詩癸集知本初從吳全節居都下所著有貞一稿而以本初爲名不知其名思本蓋未見貞一齋雜著故僅錄盜發亞父冢一詩今據鈔本雜著增錄與虞伯生吳全節倡和二首玄德卽全節賜號也

張雨

雨字伯雨一名天雨別號貞居子錢塘人至正間卒有句曲外史集

西湖志餘作黃篾樓儲古圖史作水軒于浴鵠灣營墓於靈石塢售繫腰作梁名玉鈎橋橋南數十步作藏書石室自勒

銘而吳睿隸古

杭州府志張伯雨嘗有春日游南山約云看花長安已是丈
人之行問鐵鑪步聊從太史之觀甫及春晴可無宿諾鷺峯
猿洞衆人何莫由斯靈石龍泓賢者而後樂此

答楊廉夫二首

弄水摘花春可憐風雨倦尋茅步船我家南塢有靈石龍井西頭無
杜鵑野鶴孕雛畏人過弱柳委地趁蠶眠子雲胡爲甘寂寞後世何
人知太玄

黃篋樓中唯飲酒樓下長溝鳬雁多彎頭橋斷迷青草闊處風來生
白波饒奴竟煮脫裯筍老魚戲唼如錢荷詔書寬大到海角河北飢
氓爭倒戈

道言

造物於我厚一切使我薄
瓶中有儲粟持此臥雲壑
弊衣取苟完得味在藜藿
花鳥予友于尊酒不獨酌
牀頭堆故書敗履置牀脚
未嘗身沒溺何與世濁惡
正如散馬牛不識穿與絡
異時老髑髏會有南面樂

九月風雨清齋

中林授衣節寒氣早已集
牖戶洎裘褐凡百缺治葺
窮居昧時序頗訝光景急
叢篁助幽翳漾瀨發空寂
水禽穿屋過巖樹排簷入
陶尊既塵漬墨突亦雨立
遐思把菊詠端處掬溜室
空言非藥餌殆不廢九日

澗河對雨二首

山雲油然作山雨來不緩既沾靈石塢遂灑寒栖館落水遽如許衆
草行復爛有酒不堪酌無堪把玩與聞季長笛甯從中散鍛代謝
夫何如徒爲白首歎

步歸靈澗幽泥染居士屨不知嵐雨深稍怯布衣薄拂床次羣帙掃
徑堆脫籜清坐亦偶然吾非慕仙爵

奔月卮歌答鐵雅所作

甕社明珠奔入月脫殼正似風蟬潔漁網出之不敢視滌盡含沙光
不滅文昌四星吞在腹一金晶大如菽蜃物還來作飲器日夜雄
虹繞茅屋一扇桃核寬有餘半葉蕉心捲未舒飲非其人躍入水怪
雨盲風生坐隅置之天上白玉盤斗柄挹酒長欄干李白跳下鯨魚
背持勸我飲相交歡幽宮馮夷爲予泣酌盡海水百怪出還我平生

老蚌胎許君醉臥鮫人室

鐵網珊瑚右句曲外史與袁子英所寫詩凡五十五篇其首
兩章乃此老道人效余鐵雅者也如道言清齋澗阿諸詩皆
其道趣中流出者若奔月卮則又頑仙之橫出者吁道人仙
去已一紀矣鐵雅之友屬之何人開卷愴然不勝山陽之感
云至正二十有一年花朝日抱遺叟楊維禎在清真之竹洲
館書

懷茅山

我有草堂南洞門常時行坐虎同羣丹光出林掩明月玉氣上天爲
白雲遙憶田泉洗蒼朮更思陶澗采香芹歸來閉戶償高臥莫遣人
書白練裙

西湖竹枝集其詩俊逸清贍儕輩鮮及有如丹光出林云云
不目之爲仙才不可也

贈紐憐大監

論卷聚書三十萬錦江江上數連艘遠追教授文翁學重歎徵求使
者勞石室談經修俎豆草堂迎詔樹旌旄也知後世揚雄在獻賦爲
郎媿爾曹

鐵網珊瑚自跋請以蜀文翁之石室揚雄之墨池杜甫之草
堂皆列學宮又爲甫得諡曰文貞以私財作三書院徧行東
南收書三十萬卷及鑄禮器以歸虞奎章紀其事邀予賦詩
如左

宛委餘編偶閱張伯雨贈紐憐大監詩跋云云按元史有紐

憐傳而不載此事

案詩跋亦見草堂雅集

題授經郎獻書圖

侍書愛題博士畫日日退朝書滿床奎章閣上觀政要無人知有授經郎

輟耕錄文宗御奎章日學士虞集博士柯九思常侍從以討論法書名畫爲事時授經郎揭傒斯亦在列比之集九思寵眷稍疏因潛著一書曰奎章政要以進二人不知也萬幾之暇每賜披覽及晏朝有畫授經郎獻書圖行於世厥有深意存焉張伯雨題詩云云蓋柯作畫虞必題故云

仲穆墨蘭

滋蘭九畹空多種何似墨池三兩花近日國香零落盡王孫芳草遍天涯

草木子趙仲穆者子昂學士之子宋秀王之後裔也能作蘭木竹石有道士張伯雨題其墨蘭詩云云仲穆見而媿之遂不復作

雪濤詩評趙子昂宋宗人也而仕於元書法丹青皆名後世然多有題其畫相譏訕者一人題子昂畫蘭云云

案詩評作譏子昂與集中詩題不合

西湖放燈

共泛蘭舟燈火鬧不知風露濕青冥如今池底休鋪錦此日槎頭直掛星爛若金蓮分夜炬空於雲母隔秋屏却憐牛渚清狂甚苦欲燃

犀走百靈

熙朝樂事七月十五日俗傳爲中元節地官赦罪之辰人家
多持齋誦經僧家建盂蘭盆會放燈西湖及塔上河中謂之
照冥官府張伯雨詩云云

卜居

浮家泛宅意何如玉室金堂計不疎歸錦橋邊停舫子散花灘上築
樓居淡然到處自鑿井元晏閉門方著書但得草堂費便足人生何
地不樵漁

紫桃軒雜綴散花灘在西湖東馬塍溜水閘地元張伯雨卜
居有詩云云想玉鈎橋未成黃篋樓經始之日余過訪馬塍
地不可得而杭人藝花者亦絕無佳種伯雨風流邈不可追

矣

集太白語酌僧淨月

主人碧巖裏爲余話幽棲眞訣自從茅氏得風流還與遠公齊滿堂
空翠如何掃而君解來一何好白玉麈尾談重玄琉璃硯水常枯槁
蒼蒼雲松拂彼白石世人聞此皆掉頭就中與君心莫逆袖拂紫煙
去空中聞天雞借問蘇耽鶴早晚向江西

草堂雅集鐵崖先生跋曰予觀貞居子集句詩政如冶城銅
像捧額珠蓮座于長干也可寶可玩太白見之當曰吾錦千
萬機衣被天下詩人烏得割截如此貞居子其慎取之哉勿
俾責償也會稽楊維禎跋

玉笙謠爲鐵門笙伶周奇賦

我有紫霞想愛聞白玉笙縣匏比竹無靈氣昂邱採此十二莖鳳咮
啣明珠鳳翼排素翎金華周郎妙宮徵子晉仙人初教成月下吹參
差羣雛亦和鳴緱氏山頭白雲起七月七日來相迎長謝時人一揮
手漂下滿空鸞鶴聲

大雅集評曰甚似太白

延陵公承慶堂詩

大江蒼蒼兀龍虎輔元之家百神頰望拜受釐若稽古上清真人閱
衆甫新宮潔齋導天語紛雲郁霞錯承宇虛皇穆然陽衛武左颺右
歛降軫羽縣鐘鏜鏜迅擊鼓赤金蔡服赭朱戶雙珠月明帶寶璐挾
以流黃玉櫪具旣竣大禮私事舉吉日宗族奉爵俎青紫系地簪綬
組魏張代劍新捧土饒國開觀治宿莽報君親師物咸覩撫已一念

或未溥西壁考書元範府寒冰層陰發春煦日若休明沐仁雨道德
大非方仙五月佩六印非適取持旌召趣迹旁午下土滓壙寧久處
天關會規足蹈矩願天願地多黍稷畢志萬年奉明主小史作書孰
敢侮吁嗟厚德番之祖

大雅集評曰不蹈黃庭句意深滿

吳興墨蘭

墨君石友是同參幾葉光風染碧嵐悵望王孫杳何許年年芳草滿
江南

句曲外史集曩讀葉靜齋草木子中一條云趙仲穆者子昂
學士之子宋秀王之後也能作墨蘭竹石有道士張伯雨題
其墨蘭詩滋蘭九畹云云仲穆見而媿之遂不復作所記與

此詩意正合而集中無之因附見於此鐵崖之悲不其然哉
石樓野生漫識

句

家藏逸少籠鵝字門繫龜蒙放鴨船

至正直記錢塘老儒葉森嘗登趙松雪之門松雪深愛之家
住西湖婦女頗不潔所藏王右軍籠鵝帖石刻後有唐人復
臨一帖副之誠爲妙品張外史每戲之賦詩以貽云云

案直記專記鄙猥之事並喜言人曖昧今多不錄卽錄亦時
有刪節

又

風沙不憚五千里將身跳入仙人壺

輟耕錄道士張伯雨嘗從王溪月真人入京初燕地未有梅花吳閒閒宗師時爲嗣師新從江南移至護以穹廬匾曰漱芳亭伯雨偶造其所恍若與故人遇徘徊既久不覺熟寢於中真人終日不見伯雨深以爲憂意其外出迷失街道也夢覺日已暮矣歸道所由嗣師笑曰伯雨素有詩名宜作詩以贖過伯雨遂賦長詩有云云之句嗣師大喜送翰林集賢嘗所往來者袁學士伯長謝博士敬德馬御史伯庸吳助教養浩虞修撰伯生和之

鄒復雷

復雷號雲東人

自題春消息圖

蓬居何處索春回分付寒蟾伴老梅半縷烟消虛室冷墨痕留影上窗來

鐵網珊瑚予抵鵲沙泊洞元丹房主者爲復雷鍊師設茗供後連出清江楮三番求東來翰墨師與其兄復元皆能詩畫旣見元竹復見雷梅卷中有山居老仙品題春消息字遂爲賦詩卷之端時至正秋七月廿有七日老鐵禎在蓬葦居試陳有墨尙恨乏筆

富恕

恕字

吳江人以儒入道號林屋道人

西湖竹枝詞

十里荷花錦一機雨餘荷氣撲人衣滿船游女蒙白苧陣陣腥風鷗

鷺飛

西湖竹枝集布袋筇杖不憚險道訪天下仙山有所得輒寄
於詩其作竹枝雖不本題無所比興特於題外爲善刻云

余善

善字復初玉峯清真觀道士

句

長桑樹爛金雞死 壺中天地小如瓜

列朝詩集楊廉夫跋云此予方外友余善追和張外史游仙
詩一十解予小加點讀至云云客遶床三叫以爲老鐵喉中
語也又如云云雖老鐵無以著筆矣

于立

立字彥成號虛白子南康人學道會稽山中有會稽外史集

前題

儂家住在湧金門青見高峯白見雲嶺上已無丞相宅湖邊猶有岳王墳

楊柳樹頭雙鶺鴒雨來逐婦晴來呼鴛鴦到死不相背雙飛日日在

西湖

詳燕不
花下

鄧青陽

句

忘情消白日高臥看青山

萬歷湖廣總志鄧青陽南巖道士生于元季早歲入武當從高士學黃老文始莊列周易參同龍虎大丹諸書精思純鍊

YORK UNIVERSITY

JUN 5 - 2001

EAST ASIAN STUDIES

深得其奧凡所寓興吐辭發語皆有激發寓武林有云云之句

方從義

從義字無隅貴溪人老修道金門之小洞天號方壺子洪武間卒

句

岸花汀鳥留幽意碧水丹山共隱情

元詩癸集嘗題碧水丹山圖云云清江劉永之謂方壺子非遺世者而世反遺之可爲惋惜

47